



暮叩鐘偈

願此鐘聲超法界 鐵圍幽暗悉皆聞
聞塵清淨證圓通 一切眾生成正覺

唵伽囉帝耶莎婆訶 (三遍)

洪鐘初 (二、三) 叩 寶偈高吟 上徹天堂 下通地府 (叩鐘)

上祝諸佛菩薩 光照乾坤 下資法界眾生 同入一乘 (叩鐘)

三界四生之內 各免輪迴 九幽十類之中 悉離苦海 (叩鐘)

五風十雨 免遭饑饉之年 南畝東郊 俱瞻堯舜之日 (叩鐘)

干戈永息 甲馬休徵 陣敗傷亡 俱生淨土 (叩鐘)

飛禽走獸 羅網不逢 浪子孤商 早還鄉井 (叩鐘)

無邊世界 地久天長 遠近檀那 增延福壽 (叩鐘)

三門鎮靖 佛法常興 土地龍神 安僧護法 (叩鐘)

父母師長 六親眷屬 歷代先亡 同登彼岸 (叩鐘)

南無清淨法身毘盧遮那佛 (叩鐘)

南無圓滿報身盧舍那佛 (叩鐘)

南無千百億化身釋迦牟尼佛 (叩鐘)

南無當來下生彌勒尊佛 (叩鐘)

南無極樂世界阿彌陀佛 (叩鐘)

南無清涼山金色界大智文殊師利菩薩 (叩鐘)

南無峨眉山銀色界大行普賢願王菩薩 (叩鐘)

南無普陀山琉璃界大悲觀世音菩薩 (叩鐘)

南無九華山幽冥界大願地藏王菩薩 (叩鐘)

南無大乘妙法蓮華經南無法華會上佛菩薩 (叩鐘)

聞鐘聲 煩惱輕 智慧長 菩提生
離地獄 出火坑 願成佛 度眾生